

欽
定
全
唐
文

欽定全唐文卷六百五十六目錄

新文豐出版社藏書

白居易一

荷珠賦

動靜交相養賦 并序

汎渭賦 并序

傷遠行賦

宣州試射中正鵠賦

省試性習相近遠賦

求元珠賦

漢高祖斬白蛇賦

大巧若拙賦

雞距筆賦

黑龍飲渭賦

敢諫鼓賦

君子不器賦

賦賦

洛川晴望賦

叔孫通定朝儀賦

中和節頌并序

欽定全唐文卷六百五十六

白居易

居易字樂天其先太原人徙下邳貞元十四年進士元和元年制策乙等累轉主客郎中知制誥文宗朝授太子少傅封馮翊縣侯會昌中以刑部尚書致仕大中元年卒年七十六贈右僕射

荷珠賦

以泣珠絲
鮮瑩爲韻

迸水所集輕荷正敷引脩莖而出葉凝玉液以成珠淨綠田田神龜之巢處斯在虛明皎皎靈鵲之銜來豈殊旣羅

列其青蓋又昭章於白榆亂點的皪分規青瑩仰虛無以
上出掩晶熒而外映灑之不著湛兮逾淨時寄寓於傾欹
每因依於平正可止則止必荷之中央在圓而圓得水之
本性颺風旣息而常凝魚鳥頻衝而不定爾乃一氣晴後
初陽照前宿雨霽而猶濕曉露裊而正鮮熠熠有光映空
水而煥若纍纍無數遍池塘而炯然宛轉而魚目迴視沖
融而蚌胎未堅因霑濡而小大隨散合以虧全輕彩蕩淵
穠香厭浥明璣而夜月爭光丹粟而晨霞散日其息也與
波俱停其動也與風皆急若轉於掌乃是江妃之珠如凝

於盤遂成泉客之泣冰壺捧之而殊倫水鏡沈精而莫及
則知氣有相假物有相資惟雨露之畱處當芙蓉之茂時
雖賦象而無準必成形而在茲喻於人則寄之生也擬於
道則沖而用之自契元珠之妙何求赤水之遺

動靜交相養賦

并序

居易常見今之立身從事者有失於動有失於靜斯由動
靜俱不得其時與理也因述其所以然用自做遵命曰動
靜交相養賦云

天地有常道萬物有常性道不可以終靜濟之以動性不

可以終動濟之以靜養之則兩全而交利不養則兩傷而交病故聖人取諸震以發身受諸復而知命所以莊子曰智養恬易曰蒙養正者也吾觀天文其中有程日明則月晦日晦則月明明晦交養晝夜乃成吾觀歲功其中有信陽進則陰退陽退則陰進進退交養寒暑乃順且躁者本於靜也斯則躁爲民靜爲君以民養君教化之根則動養靜之道斯存且有者生於無也斯則無爲母有爲子以母養子生成之理則靜養動之理明矣所以動之爲用在氣爲春在鳥爲飛在舟爲楫在弩爲機不有動也靜將疇依

所以靜之爲用在蟲爲蟄在水爲止在門爲鍵在輪爲柅
不有靜也動奚資始則知動兮靜所伏靜兮動所倚吾何
以知交養之然哉以此有以見人之生於世出處相濟必
有時而行非匏瓜不可以長繫人之善其身枉直相循必
有時而屈故尺蠖不可以長伸嗟夫今之人知動之可以
成功不知非其時動亦爲凶知靜之可以立德不知非其
理靜亦爲賊大矣哉動靜之際聖人其難之先之則過時
後之則不及時交養之間不容毫釐故老氏觀妙顏氏知
幾噫非二君子吾誰與歸

汎渭賦

并序

右丞相高公之掌貢舉也予以鄉貢進士舉及第左丞相
鄭公之領選部也予以書判拔萃選登科十九年天子並
命二公對掌鈞軸朝野無事人物甚安明年春予爲校書
郎始徙家秦中卜居於渭上上樂時和歲稔萬物得其宜
下樂名遂官閒一身得其所旣美二公佐清靜之理又荷
二公垂特達之恩發於嗟歎流爲詠歌予時汎舟於渭因
爲汎渭賦以導其意詞曰

亭亭華山下有人跂兮望兮愛彼三峯之白雲汎汎渭水

上有舟沿兮沂兮愛彼百里之清流以我爲太平之人兮
得於斯而優遊又感陽春之氣熙熙兮樂天和而不憂曰
予生之幸兮時哉時哉當皇唐受命之九葉兮夷與華而
無氛埃及帝纘位之二紀兮命高與鄭爲鹽梅二賢兮爰
立四門兮大開凡讀儒書與履儒行者率充賦而西來雖
片藝而必收兮故不棄予之小才感再遇於知己心慚忤
而徘徊登予名於太常兮署予職於蘭臺臺有蘭兮閣有
芸芳菲菲兮其可襲備一官而無事又不維而不繫家去
省兮百里每三旬而兩入川有渭兮山有華澹悠悠其可

賞目白雲兮漱清流其或偃而或仰門去渭兮百步常一
日而三往夜分兮扣舷天無雲兮水無煙遲遲兮明月波
澹灩兮棹黃緣日暮兮舟泊草萋萋兮沙漠漠習習兮春
風岸柳動兮渚花落發浩歌以長引舉濁醪而緩酌春冉
冉兮其將盡予何爲乎不樂鳥樂兮雲際鳴嚶嚶兮飛裔
裔魚樂兮泉底鬢撥撥兮尾澈澈我樂兮聖代心融融兮
神泄泄伊萬物各得其樂者由聖賢之相契賢致聖於無
爲聖致賢於旣濟凝爲和兮聚五福發爲春兮消六沴不
我後兮不我先適當我今生之世彼鱗蟲兮與羽族咸知

樂而不知惠我爲人兮最靈所以媿賢相而荷聖帝樂乎
樂乎汎於渭兮詠而歸聊逍遙以卒歲

傷遠行賦

貞元十五年春吾兄吏於浮梁分微祿以歸養命予負米
而還鄉出郊野兮愁予夫何道路之茫茫茫茫兮二千五
百里自鄱陽而歸洛陽朝濟乎大江暮登乎高崗山險歧
兮路屈曲甚孟門與太行楓林鬱其百尋涵瘴煙之蒼蒼
其中闕其無人唯鷓鴣之飛翔水有含沙之毒蟲山有當
路之虎狼況乎雲雷作而風雨晦忽霍霍兮不見日陽涉

泥濘兮僕夫重脰陟崔嵬兮征馬元黃步一步兮不可進
獨中路兮徬徨噫昔我往兮春草始芳今我來兮秋風其
涼獨行踽踽兮惜晝短孤宿茕茕兮愁夜長况太夫人抱
疾而在堂自我行役諒夙夜而憂傷惟母念子之心心可
測而可量雖割慈而不言終蘊結於中腸曰有弟兮侍左
右固就養而無方雖溫清之靡闕詎當我之在傍無羽翼
以輕舉羨歸雲之飛揚惟晝夜與寢食之心曷其弭忘投
山館以寓宿夜綿綿而未央獨展轉而不寐候東方之晨
光雖則驅征車而遵歸路猶自流鄉淚之浪浪

宣州試射中正鵠賦

以諸侯立戒眾士知訓爲韻

聖人弦木爲弧剡木爲矢惟弧矢之用也中正鵠而已矣
是謂武之經禮之紀故王者務以選諸侯諸侯用而貢多
士將俾乎禮無秕稗位有降殺廣場闢而堵墻開射夫同
而鐘鼓誠於以致國用充歲貢使技癢者出於羣藝成者
推於眾在乎矢不虛發弓不再控射繹志也信念茲而在
茲鵠小鳥焉取難中而能中乃設五正張三侯叶吉日於
清晝順殺氣於素秋禮事展樂容修旣五善而斯備將百
中而是求於是誠心內蘊莊容外奮升降揖讓合君子之

令儀進退周旋伸先王之彝訓故禮舉而義得且無聲而有聞及夫觀者坐入射者挺立矢既挾弓既執抗大侯伏決拾指正則掌內必取料鵠乃殼中所及雕弧乍滿當晝而明月彎彎銀鏑急飛不夜而流星熠熠其一發也騁若徹札其再中也攬如貫笠玉霜降而弓力調金風勁而弦聲急愜羣心而踴躍駭眾目而翕習若然者安知不能空彎而雁驚虛引而猿泣者也矧乃正其色溫如栗如游於藝匪疾匪徐妙能曲盡勇可賈餘豈不以志正形直心莊體舒不出範兮信得禮之大者無失鵠也豈反身而求諸

斯蓋弓矢合規容止有儀必氣盈而神王寧心警而力疲則知善射者在乎合禮合樂不必乎飲羽在乎和容和志不必乎主皮夫如是則射之禮射之義雖百世而可知

省試性習相近遠賦

以君子之所
慎焉爲韻

噫下自人上達君德以慎立而性由習分習則生常將俾夫善惡區別慎之在始必辨乎是非糾紛原夫性相近者豈不以有教無類其歸於一揆習相遠者豈不以殊途異致乃差於千里昏明波注導爲愚智之源邪正歧分開成理亂之軌安得不稽其本謀其始觀所恒察所以考成敗

而取捨審臧否而行止俾流遁者返迷途於騷人積習者
遵要道於君子且夫德莫德於老氏乃曰道是從矣聖莫
聖於宣尼亦曰非生知之則知德在修身將見素而抱樸
聖由志學必切問而近思在乎積藝業於黍稷慎言行於
毫釐故得其門志彌篤兮性彌近矣由其徑習愈精兮道
愈遠而其旨可顯其義可舉勿謂習之近徇迹而相背重
阻勿謂性之遠反真而相去幾許亦猶一源派別隨渾澄
而或濁或清一氣脈分任吹煦而爲寒爲暑是以君子積
古於時習之初辨惑於成性之所然則性者中之和習者

外之徇中和思於馴致外徇戒於妄進非所習而習則性傷得所習而習則性順故聖與狂由乎念與罔念福與禍在乎慎與不慎慎之義莫匪乎率道爲本見善而遷觀誠僞於既往審進退於未然故得之則至性大同若水濟水也失之則衆心不等猶面隔面焉誠哉性習之說吾將以爲教先

求元珠賦

以元非智求珠以真得爲韻

至乎哉元珠之爲物也淵淵緜緜不知其然存乎視聽之表生乎天地之先其中有象與道相全求之者剗其心俾

損之又損得之者反其性乃元之又元元無音聽之則希
珠無體搏之則微故以音而求者妄以體而得者非倏爾
去焉將窅冥而齊往忽乎來矣與罔象而同歸是以聖人
之求元珠也損明聖薄仁義索之惟艱失之孔易將在乎
以心忘心以智去智其難得也劇乎剖巨蚌之胎其難求
也甚乎伺驪龍之睡夫惟不皦不昧至明至幽將致之於
馴致豈求之於躁求性失則遺若合浦之徙去心虛潛至
同夜光之暗投斯乃動爲道樞靜爲心符至光不耀至眞
不渝察之無形謂其有而非有應之有信謂其無而非無

故立喻比夫至寶強名謂之元珠名不徒爾喻必有以以
不凝滯爲圓以不炫耀爲美蓋外明者不若內明之理純
白者不若虛白之旨藏於身不藏於川在乎心不在乎水
然則外其心頤其神韜其光保其真雖無脛求之必臻勞
其智役其識肆其志徇其惑雖沒齒求之不得則知真宗
奧秘妙本冥默珠者無形之形元者無色之色亦何必遊
赤水之上造崑邱之側苟悟漆園之言可臻元珠之極

漢高祖斬白蛇賦

以漢高皇帝親
斬長蛇爲韻

高皇帝將欲戡時難撥禍亂乃耀聖武奮英斷提神劍於

手中斬靈蛇於澤畔何精誠之潛發信天地之幽贊卒能
滅強楚降暴秦創王業於炎漢於時瓜剖區宇蜂起英豪
以堅甲利兵相視以壯圖銳氣相高皆欲定四海之洶洶
救萬姓之嗷嗷帝旣心闕咸陽氣王芒碭率卒晨發縱徒
夜亡有大蛇兮出山穴亘路傍凝白虹之精彩被素龍之
文章鱗甲皚以雪色睛眸超其電光聳其身形蜿蜒而莫
犯舉其首勢矯矯而靡亢勇夫聞之而挫銳壯士覩之而
摧剛於是從者告於高皇高皇乃奮布衣挺干將攘臂直
進瞋目高驤一呼而猛氣咆哮再叱而雄姿抑揚觀其將

斬未斬之際蛇方欲縱毒螫肆猛噬我則審其計度其勢
口譟雷霆手操鋒銳凜龍顏而色作振虎威而聲厲荷天
之靈啟神之契舉刃一揮溘然而斃不知我者謂我斬白
蛇知我者謂我斬白帝於是灑雨血摧霜鱗塗野草濺路
塵嗟乎神化將窮不能保其命首尾雖在不能衛其身盛
矣哉聖人之草昧經綸應乎天順乎人制勅敵必示以乃
武乃文靜災禍不可以弗躬弗親若夫龍泉黯黯秋水湛
湛苟非斯劍蛇不可斬天威煌煌神武洸洸苟非我王蛇
不可當是知人在威不在眾我王也萬夫之防器在利不

在大斯劍也三尺之長於以讐萬物於以威八方歷數旣
終聞素靈之夜哭嗜欲將至知赤帝之道昌由是氣吞豪
傑威震幽遐素車降而三秦歸德朱旗建而六合爲家彼
戮鯨鯢與截犀兕未若我提青蛇而斬白蛇

大巧若拙賦

以隨物成器巧在其中爲韻

巧之小者有爲可得而闕巧之大者無迹不可得而知蓋
取之於巽受之以隨動而有度舉必合規故曰大巧若拙
其義在斯爾乃掄材於山木審器於軌物將務乎心匠之
忖度不在乎手澤之翦拂故爲棟者資其自天之端爲輪

者取其因地之屈其公也於物無情其正也依法有程旣游藝而功立亦居肆而事成大小存乎目擊材無所棄取舍資乎指顧物莫能爭然後任道宏用隨形制器信無爲而爲因所利而利不凝滯於物必簡易於事豈朝疲而暮倦庶日省而月試知大巧之有成見庶物之無棄然則比其義取其類亦猶善從政者物得其宜能官人者才適其位嘉其尺度有則繩墨無撓工非剗厠自得不矜之能器靡雕鏤誰識無心之巧眾謂之拙以其因物不改我爲之巧以其成功不宰不改故物全不宰故功倍遇以神也郢

人之術攸同合乎道焉老氏之言斯在噫舟車器異杞梓材殊罔枉枘以鑿罔破圓爲觚必將考廣狹以分寸審刑方以規模則物不能以長短隱材不能以曲直誣是謂心之術也豈慮手之傷乎且夫大盈若沖大明若蒙是以大巧棄其末工則知巧在乎不違天真非勞形於木人之内巧在乎無枉物情非役神於棘刺之中若然者豈徒與班倕之輩騁技而校功哉

雞距筆賦

以中山兔毫作之尤妙爲韻

足之健兮有雞足毛之勁兮有兔毛就足之中奮發者利

距在毛之內秀出者長毫合爲乎筆正得其要象彼足距
曲盡其妙圓而直始造意於蒙恬利而銛終騁能於逸少
始則創因智士製在良工拔毫爲鋒截竹爲筒視其端若
武安君之頭銳窺其管如元元氏之心空豈不以中山之
明視勁而迅汝陰之翰音勇而雄一毛不成採眾毫於三
穴之內四者可棄取銳武於五德之中雙美是合兩揆相
同故不得免毫無以成起草之用不名雞距無以表入木
之功及夫親手澤隨指顧秉以律動有度染松煙之墨灑
鷺毛之素莫不畫爲屈鐵點成垂露若用之交戰則摧敵

而先鳴若用之草聖則擅場而獨步察所以稽其故雖云
任物以用長亦在假名而善喻向使但隨物棄不與人遇
則距畜縮於晨雞毫摧殘於寒兔又安得取名於彼移用
在茲映赤筦狀紺趾乍舉對紅箋疑錦臆初披輟翰停毫
旣象乎翹足就棲之夕揮芒拂銳又似乎奮拳引鬪之時
苟名實之相副信動靜而似之其用不困其美無儔因草
爲號者質陋折蒲而書者體柔彼皆瑣細此實殊尤是以
搨之而變成金距書之而化作銀鉤夫然則董狐操可以
修爲良史宣尼握可以刪定春秋其不象雞之羽者鄙其

輕薄不取雞之冠者惡其軟弱斯距也如劍如戟可繫可
縛將壯我之毫芒必假爾之鋒鏑遂使見之者書狂發秉
之者筆力作挫萬物而人文成草八行而鳥迹落縹囊或
處類藏錐之沈潛團扇或書同舞鏡之揮霍儒有學書臨
水負笈登山含毫既至握管未還過兔園而易感望雞樹
以難攀願爭雄於爪趾之下冀得雋於筆硯之間

黑龍飲渭賦

以出爲漢祥下
飲渭水爲韻

龍爲四靈之長渭居八水之一飲疊疊之清流落彬彬之
元質忽兮下降賁然躍出首蜿蜒以涌煙鱗錯落而點漆

動而無悔爰作瑞於秦川應必有徵乃效靈於漢日觀其
攸止察其所爲行藏不忒動靜有儀晴眸炫耀文彩陸離
躍於泉於焉表異守其黑所以標奇或隱或見時行時止
順冬夏而無乖應昏明而有以於是稽大易按前史叶聖
人之昌運飛而在天表王者之休徵下而飲水爾乃降長
川俯高岸氣默默以黯黯光燦燦而爛爛聞之者心駭而
屏息覩之者目眴而改觀一呼一吸而聲起風雷或躍或
騰而勢超雲漢覩夫莫智匪常莫黑至祥契昌期於南面
合正色於北方拖尾迴翔擘波騰驤飲清瀾之浩浩動素

浪之湯湯頓領而碎珠迸落奮髯而細雨飛揚警水府兮
鱣鮪奔走駭泉室兮蛟鼉伏藏元雲從而淺深一色白日
照而左右交光且彼候時出處憑虛上下度弱水而斯馭
去鼎湖而是駕聞茂先之劍飛是長房之杖化豈若此炎
精冥契水德潛稟元甲黠以凝黛文章斐兮摘錦逼而察
也類天馬出水而遊遠而望之疑晴虹截澗而飲已而負
蒼天去清渭排冥冥之寥廓反浩浩之元氣則知水物之
靈鱗蟲之貴盛矣哉抑斯龍之所謂

敢諫鼓賦

以聖人來諫
諍之道爲韻

鼓者工所制諫者君所命鼓因諫設發爲治世之音諫以鼓來懸作經邦之柄納其臣於忠直致其君於明聖將使內外必聞上下交正於是乎唐堯得以爲盛治者也至矣哉君至公而滅私臣有犯而無欺諷諫者於焉盡節獻納者由是正辭言之者無罪擊之者有時故審審匪躬道之行也齟齬不已聲以發之始也土鼓增華蕢桴改造外揚音以應物中含虛而體道不窕不擻由巧者之作爲大鳴小鳴隨直臣之擊考有若坎其缶於宛邱之下又如殷其雷在南山之隈音鏗鏘以鏜鞳響容與以徘徊徹於帝心

四聰之耳必達納諸人聽七諍之臣乃來故用於朝朝無面從之患行於國國無居下之訕洋洋盈耳幽贊逆耳之言坎坎動心明啟沃心之諫且夫鼓之爲用也或備於樂懸或施於戎政以諧八音節奏以明三軍號令未若備察朝闕發揮廷諍聲聞於外以彰我主聖臣良道在其中以表我上忠下敬然則義之與比德必有鄰將善旌而並建與謗木而俱陳是以聞其聲則知有獻替之士聆其響不獨思將帥之臣嗟乎舍之則聲寢用之則氣振雖聲氣之在鼓終用舍之由人

君子不器賦

以用之則行無施不可爲韻

君子哉道本生知德由天縱抱乎不器之器成乎有用之用不器者通理而黃中有用者致遠而任重蓋由識包權變理蘊通明業非學致器異琢成審其時有道舒而無道卷慎其德舍之藏而用之行語其小能立誠以修詞論其大能救物而濟時以之理心則一身獨善以之從政則庶績咸熙旣居家而必達亦在邦而允釐彼子貢雖賢唯稱瑚璉之器彥輔信美空標水鏡之姿是謂非求備者有何足以多之豈如我順乎通塞合乎語默何用不臧何嚮不

克施之乃伊呂事業蓄之則莊老道德雖應物而不滯終
飭躬而有則若止水之在器因器方圓如良工之用材隨
材曲直原夫根純精於妙有完元和於虛受內宏道而惟
新外濟用而可久鄙斗筭之奚算哂挈瓶之固守何器量
之差殊在性情之能不豈不以神爲元樞智爲心符全其
神則爲而勿有虛其心則用當其無故動與時合靜與道
俱時或用之必開臧武之智道不行也則守寧子之愚至
乎哉冥心在我無可而無不可應用不疲無爲而無不爲
信大成而大受非小慧而小知故庶類曲從則輪轅適用

若一隅偏執則鑿枘難施是以易尚隨時禮貴從宜展矣
君子斯焉取斯

賦賦

以賦者古詩
之流爲韻

賦者古詩之流也始草創於荀宋漸恢張於賈馬冰生乎
水初變本於典墳青出於藍復增華於風雅而後諧四聲
祛八病信斯文之美者我國家恐文道寢衰頌聲陵遲乃
舉多士命有司酌遺風於三代明變雅於一時全取其名
則號之爲賦雜用其體亦不出乎詩四始盡在六義無遺
是謂藝文之倣策述作之元龜觀夫義類錯綜詞采舒布

文諧宮律言中章句華而不艷美而有度雅音瀏亮必先
體物以成章逸思飄颻不獨登高而能賦其工者究筆精
窮旨趣何慚兩京於班固其妙者抽秘思騁妍詞豈謝三
都於左思掩黃絹之麗藻吐白鳳之奇姿振金聲於寰海
增紙價於京師則長楊羽獵之徒胡爲比也景福靈光之
作未足多之所謂立意爲先能文爲主炳如繪素鏗若鐘
鼓郁郁哉溢目之黼黻洋洋乎盈耳之韶武信可以凌轢
風騷超軼今古者也今吾君網羅六藝淘汰九流微才無
忽片善是求況賦者雅之列頌之儔可以潤色鴻業可以

發揮皇猷客有自謂握靈蛇之珠者豈可棄之而不收

洛川晴望賦

以願拾青
紫爲韻

金商應律玉斗西建嘉旬雨之時晴叶秋成而適願是用
步閭里詢黎獻皇風演溢歌且聽於昇平聖澤汪洋誦不
聞於胥怨爾乃命親懿會朋執賦邛山眺洛邑天沈寥而
雲靜氣肅殺而風急三川浩浩以奔流雙闕峨峨而屹立
飛梁徑度訝殘虹之未消翠瓦光凝驚宿雨之猶濕嘉三
時之是務觀五穀之斯入覽滌場之在勤知滯穗之見拾
及夫日色黯黯寒光熒熒遠水澄碧羣山結青山水隱映

花氣氤冥瞻上陽之宮闕兮勝仙家之福庭望中嶽之林
嶺兮似天台之翠屏宜其迴鑾輿兮檢玉牒朝千官兮御
百靈使西賓之誇少弭東人之思攸寧不亦盛哉客有感
陽舒詠樂只揮毫翰獨徙倚願得采於芻蕘終期拾乎青
紫

叔孫通定朝儀賦

以制定朝儀上
尊下肅爲韻

稷嗣君上稽天命下察人聽以爲作樂者存乎功成制禮
者本乎理定故易尚隨時禮貴從宜於以致理何莫由斯
允矣君子休哉令規採三代之帝典起兩漢之朝儀於斯

時也秦吞六雄之後漢承百王之弊禮壞樂崩上陵下替
將欲創洪業尊皇帝馴致王道丕革季世莫先乎正位以
經邦體元而立制者也夫其將用於國先習於野辨度數
於聲名文物審等威於君臣上下儒生肅以濟濟物有其
容國典煥其煌煌禮無違者然後闢雙闕會百僚動必嚴
恪進無誼囂長幼之序不忒貴賤之儀孔昭鏘鏘兮若萬
國赴塗山而會秩秩兮如百官仰太一而朝歲十月天地
澄爽宮殿清曠風傳警蹕日麗天仗於是右陳列辟左立
丞相東西分而則別文武儼以相向簪裾奕奕頌鶴鷺之

具寮劍戟森森列熊羆之名將帝容式展皇威克壯莫不
上恭己以臨下下竭誠而奉上觀其威儀允淑容止具篤
天子負鳳宸以皇皇正龍顏而穆穆百辟欣戴九賓悅服
拔劍者懲懼而慄慄飲酒者敬慎而肅肅故知君有威故
能守其邦臣有儀所以保其祿帝謂叔孫舊章斯存可以
發揮我洪德啟迪我後昆方將守而經國豈止煥而盈門
不然何以表一人之貴知萬乘之尊

中和節頌

并序

乾清而四時行坤寧而萬物生聖人則之無爲而無不爲

神唐御宇之九葉皇帝握符之五載夷夏咸寧君臣交欣
有詔始以二月上巳日爲中和節自上而下雷解風動翌
日而頒乎四嶽浹辰而達乎八荒於戲中和之時義遠矣
哉惟唐之興我神堯子兆人而基皇德太宗家六合而開
帝功元宗執象而薰仁壽之風代宗垂拱而阜富庶之俗
爲弈乎赫赫煌煌八聖重光以至於我皇我皇運元樞陶
淳精治定而化成嗣皇極於穆清納黔首於升平於時數
惟上元歲惟仲春皇帝穆然居青陽太廟命有司考時令
以爲安萌芽養幼少緩刑獄布慶賜蓋百王常行之道未

足以啟迪天地之化發揮祖宗之德乃命初吉肇爲中和
中者揆三陽之中和者酌二氣之和其爲稱也大矣非至
聖疇能建之於是謀始要終循義討源於以九八節而七
六氣排重陽而拉上巳煦元氣於厚壤則幽蟄蘇而勾萌
達噫和風於窮荒則桀驚化而獷俗淳垂萬祀以攄無窮
被四表以示大同於時兩儀三辰貞明綢繆千品萬彙熙
熙忻忻繇是文武百辟僉拜手稽首而颺言曰大哉睿德
合於元造又曰昔在唐堯敬授人時垂於典謨降及周文
在鎬飲酒列於雅頌斯蓋欽若四序愷樂一方而已未若

肇建令節混同天下澤鋪動植慶浹華夷若斯之盛歟蓋
聖人之作事必導達交泰幽贊亭毒與元化合其運與眞
宰同其功丕休哉其至矣賤臣易忝濡文明之化就賓貢
之列輒敢美盛德頌成功獻中和頌一章附於唐雅之末
頌曰

權輿胚渾元黃旣分煦嫗綢緼肇生蒸民天命聖神是爲
大人大人淳淳爲天下君巍巍我唐穆穆我皇纂承九葉
照臨八方四維載張兩曜重光齟齬唐虞赳赳義皇乘時
有作煥乎文章乃建貞元以正乾坤乃紀吉辰以殷仲春

吉辰伊何號爲中和和維大和中維大中以暢中氣以播
和風萌芽昆蟲昭蘇有融如幹元化如運神功於戲德洽
道豐萬邦來同微臣作頌垂裕無窮

欽定全唐文卷六百五十七目錄

白居易 二

河北權鹽使檢校刑部郎中裴宏泰可權知貝州

刺史依前權鹽使制

崔陵可河南尹制

侯丕可霍邱縣尉制

崔楚臣可兼殿中侍御史制

王庭湊曾祖五哥之可贈越州都督祖未怛活可

贈左散騎常侍父昇朝可贈禮部尚書制

崔羣可秘書監分司東都制

授王建秘書郎制

董昌齡可許州長史制

柳經李褒並泗州判官制

張諷等四人可兼御史中丞侍御史監察御史同
制

啖異可滁州長史許志雍可永州司戶崔行儉可
隋州司戶並准赦量移制

程執撫亡父懷信贈太保李祐亡父景畧贈太子

少傅柏耆亡父良器贈太子少保白餘盛亡父

孝德贈太保同制

嚴謨可桂管觀察使制

杜式方可贈禮部尚書制

武昭除石州刺史制

梁希逸除蔚州刺史制

盧元勳除隰州刺史制

楊孝直除滑州長史制

張嘉泰可延州長史制

魏元通除深王府司馬制

楊造等亡母追贈太君制

張植李翱等二十人亡母追贈郡縣夫人制

陳中師除太常少卿制

衢州刺史鄭羣可庫部郎中齊州刺史張士階可

祠部郎中同制

元稹可太子左諭德依前入蕃使制

盧昂量移虢州司戶長孫鉉量移遂州司戶同制

李石楊穀張殷衡等並授官充涇原判官同制

李演除左衛上將軍制

康昇讓可試太子司議郎知欽州事兼充本州鎮
遏使陳倓可試太子舍人知巒州事兼充本州
鎮遏使李容可試太子通事舍人知賓州事兼
賓澄巒橫貴等五州都遊奕使馮緒可試太子
通事舍人知田州事充左江都知兵馬使滕殷
晉可試右衛率府長史知灋州事兼充左江都
知兵馬使五人同制

西川大將賀若峯等一十二人授御史中丞殿中

監察及諸州司馬同制

前右羽林將軍李彥佐服闋重除本官兼御史中

丞知軍事制

奉天縣令崔鄴可倉部員外郎判度支案制

翰林待詔李景亮授左司禦率府長史依前待詔

制

故鹽州防秋兵馬使康太崇贈鄧州刺史制

劉總外祖故瀛州刺史盧龍軍兵馬使張懿贈工

部尚書制

劉總外祖母李氏贈趙國夫人制

蕭俛一子迴授三從弟伸制

賈璘入回鶻副使授兼御史中丞賜紫金魚袋制

張杞授廬州刺史兼御史中丞制

韓公武授左驍衛上將軍制

姚元康等授官充推官掌書記制

楊元諒等三十人加官制

李益王起杜元穎等賜爵制

王計除萊州刺史吳暉除蓬州刺史制

義武軍奏事官虞候衛紹則可檢校秘書監職如

故制

授庾敬休監察御史等制

深州奏事官衛推試原王友韓季重可兼監察御

史充職制

袁幹可封州刺史兼侍御史制

華州及陝府將士吉少華二千三百三十五人各

賜勲五轉制

京兆尹盧士玟除檢校左散騎常侍兼中丞瀛漠

二州觀察等使制

欽定全唐文卷六百五十七

白居易二

河北權鹽使檢校刑部郎中裴宏泰可權知貝州
刺史依前權鹽使制

勅某官裴宏泰以幹蠱之才領鹽鹵之務管權條制動皆
得宜觀其所能若有餘地可假兼職俾之牧人而河北列
城久乏良吏俗多思理政不難施亦猶凍餒之人易爲衣
食今予命爾煦而飫之襦袴之謠佇入吾耳可兼知貝州
刺史

欽定全唐文

卷六百五十七

白居易

一

崔陵可河南尹制

勅河洛千里都畿在焉俾之又安屬在尹正鳳翔隴州節
度觀察處置等使正議大夫檢校禮部尚書兼鳳翔尹御
史大夫上柱國安平縣開國男食邑三百戶賜紫金魚袋
崔陵有精敏之用潔直之操施於有政由是知名始資州
縣之勞卒致公卿之位況刺部有理行主計無僇違尹右
輔而鎮西郊蓋獎能報勤之旨也昔吳公爲河南守謹身
廉平人服教化袁安爲河南尹政令清肅號爲嚴明誰其
嗣之無易陵者往爲表則勿替能名可檢校禮部尚書兼

河南尹散官勲封賜如故

侯丕可霍邱縣尉制

勅賜太常寺奉禮郎翰林待詔上護軍侯丕夫執藝以事
上奉詔而處中其於出入謹身夙夜祇命比他局署實倍
恭勤既寵之以職名又優之以祿俸蓋先勞後食之義也
汝其承之可守壽州霍邱縣尉依前翰林待詔勲如故

崔楚臣可兼殿中侍御史制

勅成德軍節度押衙銀青光祿大夫檢校太子賓客兼監
察御史崔楚臣材膺爪士職在牙旗每祇命以奉辭必竭

誠而得禮既嘉詳敏亦念恭勤式示寵名宜遷憲秩可殿
中侍御史餘如故

王庭湊曾祖五哥之可贈越州都督祖未怛活可
贈左散騎常侍父昇朝可贈禮部尚書制

勅成德節度鎮冀深趙等州觀察處置等使金紫光祿大
夫檢校工部尚書兼鎮州大督府長史大夫上柱國太原
縣開國男食邑三百戶王庭湊曾祖故忠武將守左武衛
大將軍員外置同正員兼試太常卿五哥之等鬼神有知
履孝敬者福祿至王侯無種仗忠信者富貴來我有列臣

本於良允奮發而勵節許國感激而揚名顯親夫教必有
初德無不報安有收其才而遺其本愛其後而忘其先乎
是用褒崇以宏寵澤庶使聞者起孝作忠可依前件

崔羣可秘書監分司東都制

勅前武寧軍節度徐泗濠等州觀察處置等使正議大夫
檢校工部尚書使持節徐州諸軍事兼徐州刺史御史大
夫上柱國賜紫金魚袋崔羣天授至寶爲國重器始自修
已移於事君輔弼藩宣不失其道及離征鎮召赴闕庭方
登道途遂遭疾恙正在頤養之際豈任朝謁之勞誠宜許

以便安不可闕其祿食而移秩外史分曹東周加寵優賢
無易於此且有後命俟其有瘳可秘書監分司東都散官
勲賜如故

授王建秘書郎制

勅太府丞王建太府丞與秘書郎品秩同而祿廩一今所
轉移者欲職得宜而才適用也詩人之作麗以則建爲文
近之矣故其所著章句往往在人口中求之輩流亦不易
得帑藏之吏非爾官也而翱翔書府吟咏秘閣改命是職
不亦可乎可秘書郎

董昌齡可許州長史制

勅將仕郎權知泗州長史兼殿中侍御史賜緋魚袋董昌齡頃爲邑宰分贊郡符皆聞約已之名每展在公之節稽其器局允謂廉能議以稍遷用彰勤効可許州長史兼侍御史散官勲如故

柳經李褒並泗州判官制

勅徵事郎前河南縣尉柳經儒林郎試太子通事舍人李褒等瀕淮列城泗州爲要控轉輸之路屯式遏之師故府有寮軍有倅選擇補署得聞於朝廷而經等皆有所長宜

當是選守臣置奏因而可之仍加秩命用示優寵經可監察御史充泗州團練副使散官如故褒可試太常寺協律郎充武寧軍節度泗州兵馬畱後判官仍改名銜散官勲如故

張諷等四人可兼御史中丞侍御史監察御史同制

勅義成軍節度馬步都知兵馬使光祿大夫檢校太子詹事兼侍御史上柱國張諷等御史府自中執憲暨察視之官皆顯秩也惟懷材而展効者可以授焉爾等昨領偏師

出疆赴難指蹤而去摩壘而還忠勇勤勞宜有加獎故以
憲職第而寵之可依前件

啖異可滁州長史許志雍可永州司戶崔行儉可
隋州司戶並准赦量移制

勅守袁州司馬員外置同正員啖異等有司奉新制明舊
章凡負疵瑕必需慶澤况爾等各有才用多淹歲時譴累
重輕遽從恩貸班資遠邇率以例遷如聞進修豈忘牽復
可依前件

程執撫亡父懷信贈太保李祐亡父景畧贈太子

少傅柏耆亡父良器贈太子少保白餘盛亡父

孝德贈太保同制

勅中散大夫檢校右散騎常侍兼右神武軍大將軍知軍
事御史大夫上柱國河東縣開國男食邑三百戶賜紫金
魚袋程執撫父贈太子太保懷信等咸有忠勲播爲先德
悉承義訓垂在後昆故我令臣皆乃愛子襲弓裘而秉詩
禮猶水木之有本源將使天下之爲人子者感恩天下之
爲人父者知勸宜加寵贈以表顯揚可依前件

嚴謨可桂管觀察使制

勅漢置部刺史掌奉詔條糾吏理蓋今觀察使職耳桂林
秦郡也東控海嶺右扼蠻荒自隋迄今不改戎府地遠則
權重俗殊則理難馭而化之非才不可朝議大夫前守秘
書監驍騎尉賜紫金魚袋嚴謨嘗守商洛刺黔巫州部縣
道謐然安理是能用寬猛相濟之政撫夷夏雜居之人故
也跡其往効式是南邦況爾操行端和文學精茂寶寺書
府善於其官勉副前言俟申後命可使持節都督桂林諸
軍事守桂林州刺史兼御史中丞桂州本管都防禦觀察
處置等使散官勲如故

杜式方可贈禮部尚書制

勅生有寵祿歿有褒崇此王者所以明終始之恩厚君臣之道也故桂州本管都防禦觀察等使正議大夫使持節都督桂州諸軍事守桂州刺史兼御史中丞上柱國南陽縣開國男賜紫金魚袋杜式方慶襲台庭任當垣翰服名教乃保家之子樹風聲爲守土之臣盡禮事君勞心奉職奄忽淪逝念之惻然况近屬連姻遠藩捐館聞訃之命實悼中心贈飾之恩宜加常等俾趨榮於八座用賁寵於九原可贈禮部尚書仍賻布帛二百段米粟二百石委度支

逐便支遣

武昭除石州刺史制

勅某官武昭王師伐蔡爾在行間致命奮身挑戰當冠忠憤所感卒獲生全求之軍中不可多得司馬以爾信直謹厚可領邊城爾宜酬乃知己副我朝獎撫獫狁雜居之俗安離石重困之人勉而泣之其任不細可石州刺史

梁希逸除蔚州刺史制

勅某官梁希逸頃爲蔡將陷在賊庭知有君臣不顧妻子率其所屬當戰陣前反旆倒戈翻然歸我忘家之士希逸

有之間從司空再平淮右指蹤銜命皆稱所使可以移用
俾之守疆北邊列城蔚爲衝要雄右軍號務兼錢刀酬勤
選能俾乃兼領宜思來効以續前勞可蔚州刺史兼橫野
軍使并知本州鑄錢事

盧元勳除隰州刺史制

勅盧元勳乃者鎮帥承元納款之際柏耆將命之初軍情
洶然未知嚮化而元勳挺身奮臂出於衆中指明安危分
別逆順顏色不撓聲氣甚厲言行事立朕甚多之雖有優
升未酬義烈宜以一郡寵而旌之用勸四方聞其風者可

隰州刺史

楊孝直除滑州長史制

勅楊孝直早以才力從戎冀方專習武經通知吏事承元
移鎮孝直實來詢謀驅馳有所裨助軍郡之佐寵秩非輕
用答忠勞以明勸獎可滑州長史

張嘉泰可延州長史制

勅前丹州司馬張嘉泰一從戎旅多歷歲時奉職有勞率
身無過軍部長佐資秩不卑自丹轉延頗爲優穩題輿便
道往守乃官可延州長史

魏元通除深王府司馬制

勅魏元通有禦侮之才扞城之畧服勤戎職善守邊州訓
旅牧人有可稱者夫文武迭用出入序遷所以關才能而
均勞逸也爾宜解綬郡邸曳裾王門飭躬慎儀以奉朝謁
可依前件

楊造等亡母追贈太君制

勅通事舍人楊造翰林待詔某亡母等生播徽華歿畱儀
範訓保家之子爲有國之臣或相禮彤庭或待詔金馬咸
居禁近率有忠勤風樹之心必憂深而思遠蓼蕭之澤宜

自葉而流根並啟邑封各從子貴揚名之孝與汝成之可依前件

張植李翱等二十人亡母追贈郡縣夫人制

勅壽州刺史張植亡母某氏等夫忠於上者教有所自仁於下者恩有所延孝理之風實繇此作當今良二千石皆與朕共理雖祿不逮養而名可顯親將慰匪莪之心宜流自葉之澤俾從子貴咸贈邑封

陳中師除太常少卿制

勅尚書吏部郎中兼侍御史陳中師早以體物之文待問

之學中鄉里選第甲乙科及筮仕立身皆有本末不背俗以矯逸不趨時以沽名從容中道自致聞望累踐郎署再參憲司官無卑崇事無簡劇如玉在佩動必有聲爲時所稱何用不可朕以立國之本禮樂爲先今之太常兼掌其事貳茲職者不亦重乎歷代迄今謂之清選往復是命佇觀有成予方急才爾寧久次可太常少卿

衢州刺史鄭羣可庫部郎中齊州刺史張士階可

祠部郎中同制

勅某官鄭羣等今之正郎班望頗重中外要職多由是選

故其所選不得不慎必循名實而後命之羣與士階久典
名郡謹身化下有循吏之風會課陟明宜當是選國之大
事在祀與戎一掌祠曹一司武庫各領其要爾宜敬之羣
可庫部郎中階可祠部郎中

元稹可太子左諭德依前入蕃使制

勅通事舍人元稹東宮之有諭德猶上臺之有騎省也清
班優秩所選非輕朕前遣使臣往修戎好以稹言信行敬
命爲介焉揚旌出疆反駕奔命有所啟奏多叶便宜乃知
得人可以卒事故加是命以寵勸之可太子左諭德依前

入蕃使

盧昂量移號州司戶長孫鉉量移遂州司戶同制
勅萬州司戶參軍盧昂等頃負疵瑕各從譴謫或遠竄荒
裔或未復班資旣逢蕩滌之恩俾及轉遷之命況聞修省
以克己固將校試而用能吾無棄人汝宜自効可依前件
李石楊穀張殷衡等並授官充涇原判官同制

勅李石等用武之地曰涇與原合爲一鎮控扼夷虜朕授
布鉞責其成功布乃祇惕受命思有以自輔者因上言石
穀殷衡等學業才畫堪置幄中分務列官咸可其請而布

憂邊甚切選士必精爾宜各竭所能爲知已用可依前件

李演除左衛上將軍制

勅王者法鈞陳設環列非勲勤之將信近之臣則何以久
張爪牙轉致肘腋者也某官李演常從德宗皇帝南蒐於
梁籍名功臣謂之定難洎出分戎律入拱宸居內外周旋
不懈於位交戟之下周廬肅然今之轉遷示益親信移領
左廣仍參夏卿夫八屯之警巡七萃之勤情爾爲其正盡
得察之宜惜前勞無隳乃力可依前件

康昇讓可試太子司議郎知欽州事兼充本州鎮

過使陳倓可試太子舍人知巒州事兼充本州
鎮過使李容可試太子通事舍人知賓州事兼
賓澄巒橫貴等五州都遊奕使馮緒可試太子
通事舍人知田州事充左江都知兵馬使滕殷
晉可試右衛率府長史知灋州事兼充左江都
知兵馬使五人同制

勅容州本貫經畧招討左押衙兼右廂兵馬使康昇讓等
有奉職徇公之勤有理戎殄寇之効其帥公素上章以聞
吾方念勞爾宜受賞況容之諸郡有大小郡之兼職有重

輕量能第功分命而往噫方藩雖遠朝聽甚卑有善必聞
無功不錄吾言及此欲爾知之可依前件

西川大將賀若岑等一十二人授御史中丞殿中
監察及諸州司馬同制

勅丞相鎮蜀志在憂邊俾靜蕃蠻實資將校故加寵任以
責成功某官某等若干人類例勲勞進登班秩憲官名重
郡佐祿優參以命之足爲榮獎爾宜恭承主帥慎守封疆
戮力一心無落戎事可依前件

前右羽林將軍李彥佐服闋重除本官兼御史中

丞知軍事制

勅軍有羽林用法星象統之爪士以拱宸居某官某前以忠勞選登戎衛而能訓勇力之士以備時使申誰何之令以奉徼巡夙夜祇嚴不懈於位既終喪紀宜服官常假中執憲之名行上將軍之事勉修舊職用副新恩可依前件奉天縣令崔鄩可倉部員外郎判度支案制

勅奉天縣令崔鄩大凡南宮郎無非慎選者也况地官之屬有堆案盈几之文有月計歲會之課故員外郎不可逾時缺不待滿歲遷事劇才難斷可知矣而鄩自操白簡宰

赤縣繩舉違謬惠養鰥惇皆有善聲著於官次豈能於彼而不能於此乎爾宜率廩人佐計務決繁析滯期有可觀可依前件

翰林待詔李景亮授左司禦率府長史依前待詔制

勅某官李景亮夫執藝事上者必揆日時計勞績而後進爵秩以旌服勤况待詔宮闈飭躬晨夜比於他職宜有加恩官坊衛官以示優獎可依前件

故鹽州防秋兵馬使康太崇贈鄧州刺史制

欽定四庫全書
卷一百一十一
勅故某官康太崇嘗習韜鈴夙稱拳勇使之訓旅能叶武
經使之守疆能著戎績永言殂謝宜及褒榮俾追寵於朱
旛庶知恩於黃壤可贈鄧州刺史

劉總外祖故瀛州刺史盧龍軍兵馬使張懿贈工
部尚書制

勅故某官張懿德善者將啟後人忠孝者克揚前列有美
必復亶其然乎而懿仗忠履義體仁養勇學究韜畧藝窮
騎射負幽燕之勁氣雖振其名有將相之長才不得其位
命屈當代慶流後昆有外孝孫爲吾賢帥以忠許國以順

克家揚名顯親自義率祖推恩外族歸美前修俾追八座之榮以輟九原之歎可依前件

劉總外祖母李氏贈趙國夫人制

勅李氏族茂本支行光內則柔明繕性和淑保身輔佐良人克諧家道訓成賢女作相令門善積於中福延於後段公威德當流慶於外孫令伯孝心願推恩於祖母式遵贈典用贊德芬宜從大國之封追正小君之命可贈趙國夫人

蕭俛一子迴授三從弟伸制

勅吏部尚書蕭俛頃在台庭時逢郊禮大行慶澤先及輔臣當延賞於允嗣願推恩於友愛厥有典例因而從之咨爾弟伸可恭成命可河中府參軍

賈璘入回鶻副使授兼御史中丞賜紫金魚袋制勅少府少監賈璘行人之官官必有介所以敬王事而重國命也以爾璘稟訓台鼎飭躬搢紳自登班行多歷年紀恪勤官次保守令名斯可以倅貳使臣諭申朝旨宜假憲秩仍加命服以示兼寵俾之出疆況繼好二邦奉辭萬里副車之任選亦不輕茲吾使能期爾復命可依前件

張屺授廬州刺史兼御史中丞制

勅廬龍軍節度判官檢校刑部郎中張屺司徒總言爾從事於幽冀之間有年歲矣嘗委事任備觀器用務叢而益辦職久而彌勤頗出輩流宜加獎擢况公侯之嗣幕府之英餘慶所鍾有才如是今以名郡寵而任之旌善勸能仍兼中憲可廬州刺史

韓公武授左驍衛上將軍制

勅朝散大夫檢校左散騎常侍兼右金吾衛將軍御史大夫上柱國賜紫金魚袋韓公武我元老之令子也孝于家

忠于國故出則秉旄鉞入爲執金吾寵任益崇謙敬彌著而勤於夙夜疾癘所侵上陳表章乞就頤養夫環衛之列心膺之臣雖親信之寄則同而勞逸之間或異宜輟繁重俾從便安可檢校左散騎常侍兼左驍衛上將軍御史大夫散官勲如故

姚元康等授官充推官掌書記制

勅朝散郎行秘書省秘書郎姚元康儒林郎試太常寺協律郎鄭懿等益部浮陽皆大征鎮也文昌全畧皆賢將相也而能以禮聘士以職任才多聞得人咸樂爲用況爾等

籌謀文藻各負所長苟能贊察兼掌奏記孜孜不怠翩翩
有聲慰薦褒升其則不遠元康可試左武衛倉曹參軍充
劍南西川觀察推官散官如故懿可試左金吾衛兵曹參
軍充橫海軍節度掌書記散官如故

楊元諒等三十人加官制

勅右神策軍忻州行營兵馬使試太常卿楊元諒等夫才
不錄則勸善之道廢勤不賞則念功之典缺而元諒輩凡
三十人咸列禁戎遠從征討臨難有身先之勇奔命無道
敝之勞宜以祿秩酬其忠効所謂材不失選賞不逾時亦

欲使爲善者不疑有功者速勸也可依前件

李益王起杜元穎等賜爵制

勅李益等去年春朕以陵寢事大哀惶疚心而益等齋慄
奔命各率其職俾予孝道型于四海何嘗一日而忘之卽
命有司舉常典凡爵之高下視執事之重輕有司亦能遵
我成命第而次之進級益封無有不當由益而下爾宜欽
承可依前件

王計除萊州刺史吳暉除蓬州刺史制

勅王計等咸以材畧載筆從軍藝學智謀需然足用多歷

年紀備嘗艱危進退周旋不聞失道司徒宏正詳奏以聞
因以竹符分命試吏而蓬萊二郡各介一方牧人者但不
擾其心不奪其力則雖華夷南北土物不同皆可以自足
自遂矣宜用此道往安養之可依前件

義武軍奏事官虞候衛紹則可檢校秘書監職如
故制

勅某官衛紹則服勤藩鎮敷奏闕庭奉主帥之表章達軍
府之情狀嘉其忠効宜可褒升俾洽新恩用充舊職可依
前件

授庾敬休監察御史等制

勅渭南縣尉庾敬休等咸文行清茂士之秀者宜從吏列擢在朝行各隨才用分命以職司諫執憲佇有可稱

溪州奏事官衛推試原王友韓季重可兼監察御史充職制

勅某官韓季重上將臨戎陪臣將命詳其奏報頗盡事情特加寵章用獎勞効王官憲職以示兼榮可依前件

袁幹可封州刺史兼侍御史制

勅安南兵馬使封州刺史兼監察御史袁幹委質藩方稔

知戎旅嘗驅寇盜累著功勞故命遷領郡符超升憲簡足以安荒俗耀遠人敬而承之無替前効可封州刺史

華州及陝府將士吉少華二千三百三十五人各
賜勲五轉制

勅某官吉少華等距河重鎮分陝近藩俾遏寇虞實資士
旅勞既同力賞宜徧行次第其名書於勲籍可各賜勲五
轉

京兆尹盧士玟除檢校左散騎常侍兼中丞瀛漠
二州觀察等使制

勅夫疆理天下壤制四方乘時省置何常之有故方隅未
寧務先經畧則轉委方伯以總統之及兵革甫定思宏風
化則並命連帥以分理之朕常以幽薊一方環封千里延
袤廣莫專制實難屬元戎改轅新帥進律因而置制以叶
便宜蓋王者弛張變通之要也京兆尹盧士玟爲人端和
爲政寬簡自尹京輦人甚便安今司徒總籍甚爾名叶從
人望河間列郡乞委士玟因而可之必易爲理況新造之
府經始之政勞徠安輯是爾所能俾珥左貂兼執中憲寵
任不細勉哉是行可依前件

欽定全唐文卷六百五十八目錄

白居易 三

武寧軍軍將郭暈等五十八人加大夫賓客詹事

太常卿殿中監制

贈僕射蘇兆男三人妻兄一人並被蔡州誅戮各

贈太子贊善大夫等制

王士則除右羽林大將軍制

前穀熟縣令李季立授奉天丞兼監察御史充回

鶻使判官制

金史卷之三
李懷金等各授官制

王日簡可朝散大夫德州刺史制

薛元賞可華原縣令制

王承林可安州刺史制

嚴綬可太子少傅制

源寂可安王府長史制

鄭枋可河中府河西主簿制

喬弁可巴州刺史制

薛戎贈左散騎常侍制

辛弁文可淄州長山縣令制

知汴州院官侍御史盧蒙可檢校倉部員外郎陝
府院官盧台可兼侍御史鄭滑院官李克恭可
試大理評事獨孤操可衛佐並依前知院事同
制

王智興可檢校右散騎常侍兼御史大夫充武寧
軍節度副使領本道兵馬赴行營制

田羣可起復守左金吾衛將軍員外置兼澶州刺
史制

楊於陵亡祖母崔氏等贈郡夫人制

邵同貶連州司馬制

鄭公達可陝州司馬制

劉泰倫可起復謁者監制

王師閔可檢校水部員外郎徐泗濠等州觀察判

官制

薛從可右清道率府倉曹制

義武軍行營兵馬使高從政等五人河東節度行

營兵馬使傅義等二十四人並破賊可御史大

夫中丞侍御史制

故奉天定難功臣試殿中監陳日榮等一十二人
可贈商鄧唐隋等州刺史制

段斌宗惟明等除檢校大理太僕卿制

戶部尚書楊於陵祖故奉先縣主簿楊冠俗可贈
吏部郎中於陵奏請迴贈制

故光祿卿致仕李恕贈右散騎常侍制

劉悟妻馮氏可封長樂郡夫人制

夏州軍將二人授侍御史制

日試詩百首田夷吾曹璠等授魏州兗州縣尉制
衛佐崔蕃授樓煩監牧使判官校書郎李景讓授

東畿防禦巡官制

李愬李愿薛平王潛馬總孔戢崔能李翱李文悅
咸賜爵一級并迴授男同制

故工部尚書致仕杜羔贈右僕射制

幽州兵馬使劉悚除左驍衛將軍制

前幽州押衙瀛州刺史劉令璆除工部尚書致仕

制

盧衆等除御史評事制

張偉等一百九十餘人除常侍中丞賓客詹事等

制

梁璉等六人除范陽管内州判司縣尉制

渤海王子加官制

石士儉授龍州刺史制

韓萇授尚輦奉御制

孟存授成都府少尹制

杜元穎等賜勲制

商州壽州將士等賜勲制

內侍楊志和等授朝散大夫制

內常侍趙宏亮加勲制

烏行初授衛佐制

烏重允妻張氏封國夫人制

鎮州軍將王怡判官李序先被賊中誅囚並死各

贈官及優恤子孫制

武寧軍陣亡大將軍李自明贈濠州刺史制

裴宏泰可太府少卿知左藏庫出納制

李昌元可兼御史大夫制

田頴可亳州刺史制

薛伯高等亡母追贈郡夫人制

欽定全唐文卷六百五十八

白居易 三

武寧軍軍將郭暈等五十八人加大夫賓客詹事

太常卿殿中監制

勅某官某頃以齊寇發狂王師致討武寧裨將五十八人
雖有元戎指蹤制勝實由衆校同心許國合力成功宜以
憲秩儲寮寺卿府監舉申賞典用益勲庸可依前件

贈僕射蘇兆男三人妻兄一人並被蔡州誅戮各

贈太子贊善大夫等制

勅故某官男等淮寇之起爾陷其中能守父訓不失臣節
竟遇蠶蠶並爲鯨鯢葵將死而心傾劍雖埋而氣在毒延
禦侮禍及維私將賁幽魂宜追寵命俾贈青官之秩用伸
赤族之寃可依前件

王士則除右羽林大將軍制

勅羽林所設上法星文軍衛之中號爲雄重稱茲選任不
易其人左驍衛將軍王士則勲戚之家義方之子發身學
劍餘力知書早踐班榮累參環列職近而身彌檢慎任久
而心益恭勤卑以自居勞而不伐况一備禁衛四爲偏將

滯於久次宜有超升俾領上軍仍遷右廣統良家之騎士
訓期門之材官寵任不輕無墮於事可右羽林軍大將軍
前穀熟縣令李季立授奉天丞兼監察御史充回

鵬使判官制

勅某官李季立蕃國通聘使臣告行上請屬寮同役王命
以爾嘗爲令長頗有幹能加之恪恭可備選擇假威憲職
兼命邑丞足示優榮勉勤任使可依前件

李懷金等各授官制

勅博野鎮都虞候殿中監李懷金等戮力戎行叶謀王事

既展捍城之効彌章奉國之心不加寵榮何勸忠勇敢授爵命勉思令圖可依前件

王日簡可朝散大夫德州刺史制

勅前代州刺史代北軍使王日簡吾聞任有才則事集獎有勞則功勸以日簡嘗爲代守軍睦人安旌効所能可居要地是用超登階級遷領郡符勵精壹意其聽吾言夫主憂則臣勞時危則節見今寇戎暴起封域未寧是忠臣奮奇謀烈士展殊効之日也朝立功而夕受賞汝其念之哉可德州刺史

薛元賞可華原縣令制

勅前大理丞薛元賞旬服之制也署以尹正承以令長上下有統而理化行焉以元賞前爲廷尉丞察獄平刑頗聞敬慎寺卿奏課邑宰缺員故移欽恤之心使布惠和之化上承而長下字吾人無或越思而乖統理可華原縣令

王承林可安州刺史制

勅安陸古鄖國也介荆漢之間承軍旅之後宜得謹良長吏以養理之也前相州刺史王承林比刺安陽勤修其職錄勞獎善故申命焉况爾生勲伐之家早階寵祿宜自修

立以光大其門爾當思勤儉以檢身務廉平以臨下率吏用禮勸人歸農勿俱勿佻一遵吾之約束可安州刺史

嚴綬可太子少傅制

勅東朝保傅歷代尊榮漢擇名儒任先疏廣晉求耆德選在山濤實資六傅之賢用宏三善之道檢校司徒兼太子少保嚴綬文雅成器恭謙致用出領重鎮以帥諸侯入爲具寮以長卿士歷踐中外備嘗艱虞殆三十年勤亦至矣況理心以體道知命而安時是謂教誨之人可領調護之任由保遷傅爾其敬之可太子少傅

源寂可安王府長史制

勅義成軍節度判官檢校兵部員外源寂早膺慰薦累展才能謀畫有終恭勤無怠守臣推善列狀升聞可使束帶立朝廷曳裾遊藩邸俾從賓佐入補王官

鄭枋可河中府河西主簿制

勅鄭滑觀察推官試太子通事舍人鄭枋名列士林職參軍府修身無闕從事有勞旣展効於即戎宜試能而補吏俾之劇邑庶有可觀可依前件

喬弁可巴州刺史制

勅權知巴州刺史喬弁前假竹符俾臨巴郡一意爲理三年有成州人借留廉使置奏旣因會課宜及陟明九仞之功無虧一簣無狃真授而怠初心可巴州刺史

薛戎贈左散騎常侍制

勅夫有名於時有勞於國盡忠以事上遺愛而及下則必生享寵祿歿加褒崇所以旌善人而勸來者故浙東觀察使越州都督兼御史中丞薛戎挺英於冠族擢秀於士林凡踐官榮皆著聲績及授符節委之察廉自江而東政成人又老而將智病且知終方覲闕庭忽捐館舍是用廢朝

軫念加賻申恩俾增九原之光追備八貂之列可依前件

辛弁文可淄州長山縣令制

勅趙州臨城縣令辛弁文既有英材又知臣節遁逃寇難
奔走道途言念忠勞宜加恩獎俾換銅墨移宰長山可依
前件

知汴州院官侍御史盧蒙可檢校倉部員外郎陝
府院官盧台可兼侍御史鄭滑院官李克恭可
試大理評事獨孤操可衛佐並依前知院事同
制

勅鹽鐵官漕運職小大遠邇羅布於四方自丞相播兼領以來而撮大綱覈羣吏職以能進秩由課遷法無僭差人有懲勸今蒙台克恭操等咸當自舉分命以官勉副知己無忝成命可依前件

王智興可檢校右散騎常侍兼御史大夫充武寧軍節度副使領本道兵馬赴行營制

勅沂州刺史御史大夫王智興李愿李愬之鎮武寧也汝爲裨將勵節忘身濟成大功汝實有力獎其成効擢授郡符海沂之間又著聲績宜加新命以寵舊勞仍提銳師往

副戎律夫將之撫眾如子弟則眾之視將如父兄苟推赤心而無疑必蹈白刃而不悔勉親士卒佇翦寇戎可依前件

田羣可起復守左金吾衛將軍員外置兼澶州刺史制

勅前左武衛將軍田羣忠謹立身韜鈴嗣業自參戎衛尤見恭勤而燕薊之間澶爲要郡公侯之後羣有令名俾分符竹之榮佇濟弓裘之美宜奪情禮起而用之

楊於陵亡祖母崔氏等贈郡夫人制

勅大孝存乎始終殊恩被於幽顯追榮之命安可廢耶戶部尚書楊於陵亡祖母崔氏等風範有初光塵未昧發揮婦道標表母儀施及孝孫陟於高位夫蘊德者垂裕於後揚名者光昭其先俾彰積慶於中故許推恩而上各從寵贈用顯貽謀可依前件

邵同貶連州司馬制

勅朝議大夫守衛州刺史兼御史中丞邵同寵在專城職當守土不承制命擅赴闕庭違越詔條叛離官次將懲慢易宜舉憲章可連州司馬仍馳驛發遣

鄭公達可陝州司馬制

勅朝議郎守原王府長史上柱國賜緋魚袋鄭公達衆推
士行時許吏才自列班榮尤彰恭恪夙夜匪懈春秋已高
宜罷曳裾之勤往贊坐棠之理是爲優秩用答命名可守
陝州大都督府右司馬散官勲賜如故

劉泰倫可起復謁者監制

勅朝議郎前行內侍省內謁者監上柱國賜紫金魚袋劉
泰倫古者有中涓謁者皆侍奉親近之臣也今之寵秩亦
由舊焉況泰倫有行藝可以飾身才幹可以掌務監臨內

署朝請中闈謹密端和甚宜厥職久於其事無之實難宜加進秩之恩仍舉奪情之典勉承獎任勿替初終可起復朝議大夫行內侍省內謁者監

王師閔可檢校水部員外郎徐泗濠等州觀察判

官制

勅前徐泗濠等州觀察支使朝議郎殿中侍御史內供奉上騎都尉賜緋魚袋王師閔朕以師律授智興智興以軍書辟師閔才旣爲知己用官不俟滿歲遷所以使能而責理也然則贊廉察安戎旅旣命之後吾有望於爾焉勉副

所從佇展來効可檢校尚書水部員外郎兼殿中侍御史
充徐泗濠等州觀察判官勲賜如故

薛從可右清道率府倉曹制

勅三品子薛從惟汝父平守吾藩鎮能以忠力殄寇安人
酬庸旣以啟封延賞亦宜及嗣勉承義訓無忝寵章可朝
散郎行右清道率府倉曹參軍

義武軍行營兵馬使高從政等五人河東節度行
營兵馬使傅義等二十四人並破賊可御史大
夫中丞侍御史制

勅古者賞不逾時所以勸勲庸也爵有加等所以激忠勇也而某官高從政等以義武之師統晉陽之甲前蹈白刃中推赤心大摧賊徒連告戎捷超榮速賞爾實當之故視軍功遞遷憲秩破竹之勢其思有終可依前件

故奉天定難功臣試殿中監陳日榮等一十二人
可贈商鄧唐隋等州刺史制

勅春秋崇褒善之義國家厚追榮之寵其身歿而名不殞時去而恩未及者大司馬得稽勲籍舉而行之故某官某等凡十二人按狀徵書宜加寵命飾終之典其可廢乎可

依前件

段斌宗惟明等除檢校大理太僕卿制

勅義武軍節度都押衙兼侍御史段斌衙前虞候檢校太子賓客宗惟明等寇虞未平將校方用宜以爵賞勸其忠勞而斌奔命獻俘惟明奉章告捷各勤乃事咸造於庭並加寵榮以示優獎斌可試太僕卿依前兼侍御史惟明可檢校大理卿餘各如故

戶部尚書楊於陵祖故奉先縣主簿楊冠俗可贈

吏部郎中於陵奏請迴贈制

勅故某官楊冠俗貽厥孫謀垂裕後世揚其祖美不忘先
也以冠俗之棲遲下位道屈於時以於陵之光大其門慶
鍾於後生不逮事歿有追榮宜加義率之心用舉飾終之
典可贈吏部郎中

故光祿卿致仕李恕贈右散騎常侍制

勅故某官某國老之子藩臣之兄嘗列棘以承家竟懸車
而捐館生加爵寵歿及褒榮茲惟舊章用慰幽宥

劉悟妻馮氏可封長樂郡夫人制

勅古者有策名命婦賜號夫人蓋積善於閨門而受封於

國邑也澤潞節度使劉悟妻馮氏傳芳茂族作合良臣成此忠貞之功因於輔佐之力禮從夫貴慶叶家肥俾開大郡之封以正小君之命可封長樂郡夫人

夏州軍將二人授侍御史制

勅某官某等早稱武藝久隸軍麾稟命元戎服勤王事或千里移鎮從爲紀綱或十乘啟行倚爲肘腋綿歷年月積成勤勞不加寵榮何勸忠効並命憲職宜敬承之並可兼侍御史餘如故

日試詩百首田夷吾曹璠等授魏州兗州縣尉制

勅乃者魏充二帥以田夷吾曹璠善屬文貢置闕下有司
奏報明試以詩五言百篇終日而畢藻思甚敏文理多通
賢侯薦延宜有升獎因其所貢郡縣各命以官而倚馬爰
來衣錦歸去以文得祿亦足爲榮可依前件

衛佐崔蕃授樓煩監牧使判官校書郎李景讓授

東畿防禦巡官制

勅某官崔蕃等咸因文行自致班序或佐衛蘭錡或典校
蓬山各從所知將展其用夫司牧垌野備禦都畿所以班
馬政而遏寇虞也茲皆重務爾勉贊之可依前件

李愬李愿薛平王潛馬總孔戢崔能李翱李文悅

咸賜爵一級並迴授男同制

勅封爵之設在乎賞勸有以褒德有以序勤聳善興功實由茲道而某官李愬等或望崇台鼎或委重旌旄爰及藩條共分憂寄有勞於事無怠於心宜疏爵以啟封許推恩而及嗣祇受厥命永孚於休可依前件

故工部尚書致仕杜羔贈右僕射制

勅故某官杜羔生於仁族發爲公器敦厚孝友本乎天性文學政事出於餘力自立朝右藹然素風司諫平刑駁議

廉問凡所踐歷不懈於位以年致政以疾就第出處進退
皆叶時中遽此淪謝惻惻興念夫生有榮祿歿有寵贈所
以極君道厚時風亦聖人有始卒之義也宜追端揆以申
褒飾猶有精爽知吾不忘可贈尚書右僕射

幽州兵馬使劉悚除左驍衛將軍制

勅某官劉悚夙負氣概早習騎射才推燕趙之士學究孫
吳之書加以忠厚可當任用况有令弟爲吾信臣節著艱
貞情鍾友愛夫寵寄於外莫重於藩垣委任於中莫親於
禁衛加此一職寵示二人豈不爲榮季出叔處可左驍衛

將軍

前幽州押衙瀛州刺史劉令璆除工部尚書致仕

制

勅某官劉令璆勲伐之家弓裘之嗣嘗修戎職亦領郡符
迨此遲暮知有止足夫壯而奮發以忠事國老而知退以
道安身人所難能理宜嘉尚俾超崇秩以寵高年可工部
尚書致仕

盧衆等除御史評事制

勅幽州節度判官盧衆等幽薊重鎮盧龍舊軍是吾北門

委在上將實資寮佐以濟謀猷爾等或參務戎旃或專司奏記俱因事任各展才能而御史府官廷尉寺吏用申褒獎以勸忠勤勉奉元戎佇成嘉績

張偉等一百九十餘人除常侍中丞賓客詹事等制

勅盧龍軍押衙兵馬使什將隨軍某等夫爵賞行於上則忠勞勤於下有國之典其可廢乎吾思薊首將及吏合聚衆力鎮寧一方綿以歲年積成勤効令以朝右貴秩言坊清班舉爲寵章用申酬獎

梁璵等六人除范陽管內州判司縣尉制

勅盧龍軍節度要籍梁璵等咸以幹能早膺任使各參軍
要同濟戎功言念恭勤宜加優獎郡掾邑佐分而命之仍
兼舊職勉申來効可依前件

渤海王子加官制

勅渤海王子舉國內屬遣子來朝祇命奉章禮無違者夫
入修職貢出錫爵秩茲惟舊典舉而行之

石士儉授龍州刺史制

勅石士儉東川帥涯上言士儉久習武藝兼通吏事可使

爲郡責成其功吾聞江油巴夷雜處勿以遐陋而忘緝綏
奉法愛人無負知己可龍州刺史

韓萇授尚輦奉御制

勅韓萇局分六尚職奉七輦茲惟優秩列在通班以爾立
身頗恭守事甚謹宜有所獎可升於朝可尚輦奉御

孟存授成都府少尹制

勅孟存嘗參劇務亦牧疲人咸有能名得於主帥三蜀征
鎮屯於成都雖有忠賢委爲尹正至於贊修庶務通統諸
曹承而貳之實資亞理勉勤厥職無累所知可成都府少

尹

杜元穎等賜勲制

勅中書舍人杜元穎等有位於朝有勞於事不加慶賜何
勸恪勤宜各策名列於勲籍可依前件

商州壽州將士等賜勲制

勅某官某等夫勲者所以馭貴敘勞亢身庇族非因大慶
不降殊恩爾皆委質從軍服勤事國宜按勲籍分而賜之
可依前件

內侍楊志和等授朝散大夫制

勅楊志和等成分要職列在內司愼靜檢身恭勤守事宜以章綬命爲大夫佩服寵光爾無失墜可依前件

內常侍趙宏亮加勳制

勅內常侍趙宏亮等列名禁籍祇命宮闈多厯歲時積成勞効宜加勳賞以洽恩榮可依前件

烏行初授衛佐制

勅烏行初重允之子早稟義方詩禮弓裘式聞不墜賞延之典本勸忠勳環衛之官兼資愼擇非唯久任亦以才升可佐衛曹參軍

烏重允妻張氏封國夫人制

勅古者夫爲大夫則妻爲命婦況在小君之位未加大國之封豈惟有廢徽章抑亦無勸忠力也某官某妻某氏以鳴鳩之德作合邦君輔成勲猷馴致爵位雖從夫貴未授國封今以南陽本邦善地錫爲湯沐加號夫人茲乃殊榮足光閨閫可封鄧國夫人

鎮州軍將王怡判官李序先被賊中誅囚並死各贈官及優恤子孫制

勅朕嘗思鎮冀之間弔伐之際有仗順死義不吾聞者因

命宏正列狀以聞而某官王怡等頃陷艱虞思伸忠効或名節將立併命於幽憂或義烈臨奮失身於戮辱履危如虎尾視死如鴻毛若無褒揚何勸天下旣降飾終之命仍加身後之禮追崇延寵有越常倫冀使死節之魂忠憤之骨知我憐憫歿無恨焉怡可贈左僕射序可贈給事中

武寧軍陣亡大將軍李自明贈濠州刺史制

勅王師之討蔡平鄆也自明爲武寧裨將隸於元戎凡所指蹤必先致命三軍之士於今稱之有勞未圖無祿早代生不及賞歿而加恩庶使猛將義夫聞而相勸曰死猶不

忘況生者乎可贈濠州刺史

裴宏泰可太府少卿知左藏庫出納制

勅前度支河北權鹽使朝議郎檢校尚書刑部郎中使持節貝州諸軍事兼權知貝州刺史侍御史充本州防禦使上柱國賜紫金魚袋裴宏泰九土之貢百品之貨辨其名物謹其出納常在外府統以上卿宜求幹敏之才以爲之貳而宏泰頃分樞務兼撫郡民當軍興之時法行政立則受藏之府事繁物殷量其器能可以專委勉膺是任無替前勞可守太府少卿知左藏庫出納散官勲賜如故

李昌元可兼御史大夫制

勅通議大夫使持節儀州諸軍事儀州刺史兼御史中丞
上柱國李昌元弓裘令子疆場勞臣能讀父書甚識戎事
每在戰陣未嘗無功及委藩條亦聞有政而知臣者君也
賞勞者爵也亞相之秩威重寵崇加乎爾身以勸能者可
兼御史大夫

田頴可亳州刺史制

勅正議大夫前檢校右散騎常侍使持節洺州諸軍事兼
洺州刺史御史大夫充本州團練使上柱國賜紫金魚袋

田頴自別屯將壘專領郡城而能勤恤師人與之勞逸故
臨戎則士樂爲用撫下而衆知嚮方忠勲旣彰能政亦著
牧守之選吾所重之譙鄴之間人亦勞止授爾印綬往勞
來之宜推前心佇立後効可檢校右一作左散騎常侍使持
節亳州諸軍事兼亳州刺史御史大夫本州團練使鎮遏
使散官勲賜如故

薛伯高等亡母追贈郡夫人制

勅某夫人某氏等始播婦儀終垂母道教其令子爲我良
臣皆茂著才名榮居爵位永言聖善宜及顯揚俾追啟邑

之封式表統家之訓可依前件